



831011

西滙外集卷第八

劄書補

天地閒惟道貴天地閒人惟得道者貴

道在天地閒不限於取數之多心力勤者得多心力怠者得

少昏弱者一無所得

世閒萬事須臾變滅不足置胸中惟修心是究竟法耳

人祇有二箇心若不降伏得更做甚人

西滙外集 卷八 劄書補

人心祇有箇天理卻不能存得更做甚人

養得胸中無一物其大浩然無涯

人不無差錯念頭好在要扯得轉來

當怒火欲火正騰湧時明明知得又明明犯着知得是誰犯

着又是誰此處能猛然勒轉最見力量

人心之明有時而悔心生有時而懼心生此二心固人之所

不能無亦人之不可少者然有悔之而猶可為者有悔之

而已無及者故事後知悔不如事前知懼

有智術人不但不可用於不正凡小處閒處俱不可用益每

國朝
新津童
成都宋
眉州劉
男 茲 校 刊

編 輯
校 刊

事計較遲聰明求勝着卽此便犯天人之忌且物數用則易做今如干將莫邪平時用以殺狗割雞必至鋒鏖日減及屠龍刺虎反不堪用

思其所當思慮其所當慮然且不容太過况在非分者耶人若不貪富貴食色便超然萬物之表

滿則慮嗛平則慮險安則慮危

命在天君子之命在我小人之命亦在我君子以義處命不以其道得之則不處命不足言也小人以欲犯命不得而必欲得之命不肯受也但君子謂命在我得天命之本然小人謂命在我倖氣數之或然是以君子之心常泰小人之心中常勞

西滙外集

卷八 紀書補

二

君子以氣數從義理決不舍義理從氣數是以富貴不能淫貧賤不能移

富益求富至於一毛不拔到那數窮理極之時必至連皮帶肉將通身都打折了人言世間貧苦人最是薄福余謂世間一種慳吝的富人其薄福更甚於貧苦人

一縷之肉而萬蟻啣之一勺之水而萬魚吸之欲滿其欲得乎

大段排遣不去祇思古人所遭苦難有大不堪者將以自比則亦可以自寬矣

不從軀殼上起見將身放在萬物中一體看真快活也惟私意之所存經營計量必得其欲而後已又安得有快活時凡事各有委曲緣由雖得諸目見猶當平心細察况在傳聞者耶只詞氣抑揚輕重閒便易失實正不獨任意增減者之種種難憑也

人以言來我以言往耳審而後受舌審而後出耳舌之際有若重關者內重故也

西廂外集 卷八 祝書補

人有貌合而心離言是而行非者每藏裂背於嬉笑伏利刃於樽罍非清心明眼人不足以照之

鷹立如睡虎行如病奸人之工於攫人噬人者恆用此術遇之而毫無警覺鮮不墮其術中矣

非恃其不攻恃吾有所不可攻此可以為遠小人之法

無情無義之人自當遠絕若不得已而與之同行須外和吾色內密吾神庶幾不受其害

處人之難處者正不必與之辨是非較長短惟謹於自修愈謙愈約彼自服不服者妄人也又何較焉

自反者退心也萬福皆生於退反

冤愆勿復復之勢如索綯有百千生所不能了者

論理要推詳論事要愷切論人要帶二三分渾厚若切中人
情人必難堪故君子不盡人之過非惟遠禍亦以留人掩
飾之路啟人羞惡之心觸人悔悟之機亦天地之含蓄氣
也

念人之惡而積惡於心是我之惡更甚於他人之惡論人情
祇往薄處求說人心祇從惡邊想此是私而刻的念頭自
家便是箇小人

西滙外集

卷八

雜書補

四

彼之所知非彼則不及知所以說耕當問奴織當問婢

欲人之不見莫若晦其明欲人之不知莫若暗其聲

鐸以聲自穴膏以明自鑠虎豹之文來射猿狖之捷來搨

其文好者身必剝其角美者身見殺甘泉先竭直木先伐

亂世不宜多取名小人忘名亦樂附名忌則被其害附則被

其辱以虛名而受實禍豈不可惜

聖人隨時而舉事因資而立功守清道拘雌節因循而應變

常後而不先

非首任非獨任不可爲禍福先禍先福始皆危道也

疎於料事而拙於謀身明哲之所大懼也

學子之相似惟其母知之利害之相似惟知者知之

削株掘根無與禍隣禍乃不存

涵容是處人第一法安詳是處事第一法謙退是保身第一

法置生死常變於度外是養心第一法

自德性中來死生不變自識見中來則有時而變矣故君子

以識見養德性德性堅定則可生可死

未試於火皆純金也未試於事皆完人也天下之變不可勝

窮自非膽識明決德性堅定鮮不試之而立敗者

西滙外集

卷八 雜書補

五

識不早力不易制人欲在初起時極易剿捕到那橫決時非

奮萬夫不當之勇不可

過猶病如此是病不可如此便是藥

自戒而不能守猶無戒也今日悔之而明日犯之其心之亡

也久矣道焉能入

迷復不已遂至顛復

米鹽妻子無事應酬以道心處之無非道者

行庸德謹庸言不以飢渴之害爲心害聖人之道在是矣

今人不學自守先學趨時所以凡事苟且不能自立

人不宜同乎流俗其不同者非自高自大也思有以自別耳
思所以自別則知所以自處矣

人生最難克者是利欲利欲之關在富貴貧賤此關打不過
任你說得天花亂墜盡是閒話也

眞是在我天下非之而不顧眞得在我舉世不知而不悔
俗士以詩書爲利達之媒一旦得志不能有所建白有所樹
立卻又不肯捨之而去非羝羊也直駑馬耳

講道論學事事在規檢中吾人自應如此然人之姿稟不一
趨舍萬殊苟不得罪名教抑且心地乾淨不爲勢利所糾

西滬外集

卷八 亂書補

六

纏卽栖託佳山水寄情於一草一木甚或爛游爛醉脫略
一切亦止是各行其志此輩人在聖門中未始非狂簡之
流正不得以世法繩之

日中則昃月盈則虧天道也高岸爲谷深谷爲陵地道也滿
招損謙受益人道也

人心爲嗜欲所糾纏好似被他械禁一般故良心之亡曰梏
亡惟其梏所以亡也

趾所以行轉所以言良其趾雖行猶不行也良其輔雖言猶
不言也

伯夷不立於惡人之朝不與惡人言可謂離世絕俗矣然不
念舊惡未嘗流於刻薄也柳下惠袒裊裸裎焉能免我可
謂和光同塵矣然不以三公易其介未嘗入於苟且也
以能問於不能五句和風慶雲之氣象也富貴不能淫三句
泰山巖巖之氣象也

趙岐孟子註云凡物圓則行方則止此解最明徹嘗試廣其
義惟圓則無滯礙故曰圓通惟圓故無間缺故曰圓滿至
乾竺之教極於圓覺大易之用妙於圓神天下之能事畢
矣

西滙外集

卷八 雜書補

七

周易無皆作无王述曰天缺西北爲无蓋東南爲春夏陽之
伸也故萬物敷榮西北爲秋冬陽之屈也故萬物老死老
死則无矣此字說之有意味者

美雲根閉朋牖太元之心學也

禪家有理障之說畢竟理無障是識障

三教傳心要法總之不離一靜字下手處都是制欲歸宿處
都是無欲是則同

先儒言靜坐中須有物乃可釋氏言不可坐向鬼窟須靠一
念子乃可老氏之法如守黃庭存踵息意思都是一般大

抵心必有所寄而後可以常存非慮其落空蓋欲免其馳騫也

諺云人心象膽世事獺肝象膽十二月分屬各體獺肝凡十二析月腐一析則他一析更新人心不定世事無常故以二者喻之

諺云登山耐險道踏雪耐危橋一耐字極有意味以傾側之人情坎坷之世道不得一耐字撐持過去幾何不墮入榛莽阨壑哉

生爲人所咀嚼死爲人所歡快左雄語也舉頭三尺有神明西滬外集卷八

魏書補

八

徐鉉語也

世人皆云不欺神明須知神明不是天地百神但不欺心卽是不欺神明也

世人有二顛倒少年當勤反自放逸古詩云少年虛歲月不解早謀身老大成無用低眉向世人老年當逸反自勞役古詩云可憐七八十齒落雙眸昏朝露貪名利夕陽憂子

孫

免於饑寒而無意外之虞樂莫樂於此矣古語有云力勝貧慎勝禍人能以此自勝可以勝人可以勝天要非耐苦耐

煩耐辱者不能也

王近思問平時無事是非之辨似不能惑事至而應則陷於非者十七八雖隨卽追悔後來又如故其道何由程子曰此本心陷溺已久浸灌未透之故

或問遇事時亦知理之是非到做處又卻做了不是後卻又悔朱子曰此是無克己工夫須要遇事時便克去不得苟且放過

或問第五倫曰公有私乎對曰昔人有與吾千里馬者吾雖不受每三公有所選舉必不能忘而亦竟不用也吾兄子嘗病一夜十往退而安寢吾子有疾雖不省視而竟夕不眠若是者豈可謂無私乎

廬山之麓有老儒杜了翁者或勸其從陽明先生講道了翁曰吾聞聖人之道在論語某於其中言忠信行篤敬六字敏求之四十餘年未之有得又惡乎講哉或曰道豈言行可盡耶了翁曰吾聞言行君子之樞機也又聞言行君子之所以動天地也若外言行而講道某不願聞也他日陽明聞之曰不可謂深山窮谷無人

趙清獻公每夜燒天香必擎鑪默告若有所密祝者客疑而

問之公曰吾自少盡日所爲夜必哀奏蒼蒼眇冥一夫區區之誠安必能達亦姑自防遣使不可奏者不敢爲知有所畏耳

陳密嘗爲朱墨銘謂朱屬陽墨屬陰以驗理欲分寸之數

趙康靖宴居之室置三器於几上一貯黃豆一貯黑豆而空其一興一善念則投一黃豆興一惡念則投一黑豆用以自警

宋文獻公嘗錄古人盛德事有誚其迂者公謝曰老夫錄此空言無補但要常在目前則長厚之心日生刻薄之念日

西滙外集

卷八 雜書補

十

消如盆魚之養於清水勝於穢濁相混也

鐵腳道人墓有九字經勿欺心勿妄語守廉恥係之語曰此經字約而義博知之甚易行之甚難苟能實踐可謂君子郭文舉入餘杭山窮谷中倚木於樹苦覆而居都無壁障餘杭顧颺贈以韋袴褶具文舉不納使者置室中而去乃至衣爛終不服用

范宣潔行廉約韓豫章遺絹百匹不受減至五十四匹復不受至一匹終不受後裂二丈云寧可使婦無禪耶乃笑而受之

梁伯鸞嘗獨止不與人同食比舍先炊已呼伯鸞及熱釜炊
伯鸞曰童子鴻不因火執者也滅竈更然之

寇雋家人曾賣物與人而剩得絹五匹雋後知之乃曰惡木
之陰不可暫息盜泉之水無容誤飲得財失行吾所不取
訪而還之

韓家奴家有一牛不任驅策其奴得善價鬻之韓家奴曰利
己誤人非吾所欲乃歸直取牛

明山賓嘗乏用貨所乘牛既受錢謂買主曰此牛經患漏蹠
治瘡已久恐後脫發無怪不相語買主遽追取錢阮孝緒

西滙外集

卷八

亂書補

士

聞之嘆曰此言足使還淳反樸激薄停澆矣

查道常出按部路側有佳棗從者摘以獻道計直挂錢於樹
而去

交州刺史袁曇緩密以金五百兩寄歐陽頴令以百兩還合
浦太守龔爲百兩附兒智雅餘人弗之知也頴尋爲蕭勃
所破貨財並盡惟所寄金獨在曇緩亦尋卒頴至是仍依
信還之

李勉少貧俠客梁宋與一生共逆旅生病且死出白金曰左
右無知者幸君以此爲我葬餘則君自取之勉許諾密置

餘金棺下後其家謁勉共啟墓出金付之

趙軌東隣有桑椹落其家軌遣人悉拾還其主戒諸子曰吾非以此求名但非己之物不侵人汝等宜以爲法

許衡過河陽渴甚道有梨眾爭啖之衡獨危坐樹下自若或問之曰非所有而取之不義也曰世亂此無王曰梨無主吾心獨無主乎

沈麟士爲隣人認所着履曰是卿履耶予之隣人得所失履送還曰非卿履耶笑而受之

劉寬爲司徒嘗行有人失牛者就寬車中認之寬無所言下

西渥外集

卷八

魏書補

三

車步歸有頃認者得牛送還叩頭謝曰慙負長者隨所刑罪寬曰物有相類事容脫誤幸勞見歸何爲謝

韓魏公夜作書令一侍兵持燭兵他顧燭然公鬚公以袖麾之作書如故少頃回視則已易其人矣公恐至吏鞭之急呼曰勿易渠今解持燭矣

曹侍中彬嘗知徐州有吏犯罪既立案逾年然後杖之人皆不曉其旨彬曰當時此人新娶婦若杖之彼舅姑必以婦不利而惡之吾故緩其事而法亦不赦也

劉寬嘗坐客遣蒼頭市酒良人醉而還客不堪之罵曰畜

產寬須臾遣人視奴疑必自殺顧左右曰此人也罵曰畜
產辱莫甚焉吾故懼其死也

張忠定公視事退後有一僕在廳上熟睡公詰之汝家有甚
事對曰母父病兄爲客未歸訪之果然翌日差場務一名
給之且曰吾廳上有敢睡者耶此必心極幽僨使之然耳
劉光祖一日晨坐煖閣夫人方梳洗有舊友來訪公令夫人
出閣迎其人進夫人挈洗具偶遺金釵一公適起入內夫
人在窗隙內見其人拾所遺釵入懷未穩公將出夫人掣
公袖止之少頃公乃出客退問其故曰偶遺小釵彼方收
西滙外集 卷八 類書補
拾未穩不欲遽恐之耳

劉仲輔初婚偷兒入室起視之乃所識人也卽檢奩中物予
之令去且曰吾終不言後夫人問其爲誰公曰已許不言
矣

華歆與王朗俱乘船避難有一人欲依附歆難之朗曰幸尙
寬何爲不可後賊追至朗欲舍所攜人歆曰本所以疑正
爲此耳旣已納其自託寧可以急相棄耶遂攜拯如初

朱暉與張堪同縣張於太學見之把臂語曰欲以妻子託暉
不敢對張亡後聞其妻子貧困自往厚贍之暉子頡怪問

之暉曰堪有知己之言吾已信於心也

季札初出使北過徐徐君好季札劍口不敢言季札心知之未獻還至徐徐君已死乃解劍挂於塚樹而去從者曰徐君已死當誰與乎季子曰始吾心已許之豈以死而背吾心哉

崔光少有大度有毀之者必善言以報之終不自申曲直謝無奕性粗強以事不相得往數王藍田肆言極罵王面壁不復動半日謝去良久轉頭問左右小吏曰去未答云已去然後復坐時人歎其性急而能有所容

西滙外集

卷八

劉書補

十四

李栖筠喜獎人善而樂人攻己短

王惠素不與謝靈運相識嘗得交言靈運辭義蜂起惠特後言時苟伯子在坐退而告人曰靈運固自蕭散直爽王郎有如萬頃波焉

魏長齊雅有體量而才學非所長初宦當出虞存嘲之曰與卿約法三章談者死文筆者刑商略者抵罪魏怡然而笑無忤於色

孫伏伽與張元素在隋時皆爲令史太宗嘗問元素宦位所來深自羞浮伏伽雖廣坐敷陳無所隱焉

桓温止新亭大陳兵衛呼謝安與王坦之欲於坐閒害之王
入失措倒持手版汗流沾衣安神色不異於常目輪厯左
右衛士謂温曰明公何用壁開阿堵輩温矜莊之色頓盡
促讌行觴笑語移日

查道游五臺一夕雲雷破柱道坐其下了無怖色眾僮異之
王子敬子猷俱坐一小室忽發火子猷遽走避不遑取履子
敬神色恬然徐喚左右扶憑而出不異平常

裴粲曾詣清河王懌始進便暴雨粲容步舒雅不以霑濡改

節懌令人持蓋覆之歎曰何代無奇人

西漚外集

卷八

飢書補

五

王獻之夜臥有偷人入其室盜物都盡獻之曰偷兒青氈我
家舊物可特置之羣偷驚走

張融爲封然令廣越嶂嶮獠賊執融欲殺食之融神色不動
方作洛生詠賊異之而不害也

齊宣都王銓年十歲與吉景曜商略前言往行左右誤排枿
榴屏風倒壓其背神色不異言談不輟

沈懷文不飲酒又不好戲調謝莊嘗誠懷文卿每與人異亦
何可久懷文曰吾少來如此豈可一朝而變非欲異物性

所得耳

僕射高肇以外戚之貴勢傾一時朝士嘗望塵拜謁裴榮候肇一揖而已及還家人尤責之榮曰何可自同凡俗

封軌高綽均以風槩立名尚書令高肇拜司徒綽送迎往來軌竟不詣綽顧不見軌乃遽歸曰吾今日舉措不如封生

達矣

盧義僖散秩多年澹然自得李神儻勸其干謁當途義僖曰學先王之道行平生之志何能苟求富貴也

明帝廢鬱林領兵入殿左右驚報謝淪淪與安圍棋竟局乃還竟不問外事明帝卽位淪又屬疾蕭詵以兵臨起之淪

西滙外集

卷八

魏書補

七

曰天下事公等處之足矣且死者命也何足以此懼人

范純夫數上書論事其言激切文潛少游懇勸不回其子冲亦因閒言之公曰吾出劍門關稱范秀才今復爲布衣何爲不可

李垂字舜工李康伯謂曰舜工文學議論稱於天下諸公欲用知制誥但宰相未嘗相識盍一往見之垂曰我若謁丁崖則乾興初已爲翰林學士矣今已老久見大臣不公常欲面折之焉能趨炎附熱看人眉睫以冀推挽乎道之不行命也

謝上蔡在史局不謁執政曰我自有命在他安能陶鑄得我
劉放孫資斷制朝政辛毗不與往來毗子做諫曰今孫劉用
事眾皆影附大人宜小降意毗曰吾之立身自有本末就
令孫劉不平不過令吾不作三公耳何害之有
楊休之北齊執政者欲封爲王以寵之休之固辭而謂人曰
我非猿非奴何事封王耶

諸葛瞻初統朝事廖化過宗預欲與其詣瞻預曰吾年踰七
十所竊已過止少一死耳何求於年少輩而屑屑造門耶
竟不往

西滙外集

卷八

列書補

七

宣宗欲以韋澳判戶部侍郎澳以心力衰耗難處煩劇爲辭
上不悅及歸其甥柳玘尤之澳曰爾知時事不佳乎由
吾曹貪名位所致耳

齊孝昭欲以王暉爲侍中苦辭不受或勸暉勿自疏暉曰少
年以來閱人多矣充誦少時鮮不敗績且性實疏緩不堪
時務人主恩私何由可保萬一披猖求退無地非不愛作
熱宦但思之爛熟耳

耶律官奴致政歐里部人蕭哇謂官奴曰仕不能澤民致主
成大功烈何屑屑爲也吾與若居林下以枕簟自隨觴詠

自樂雖不宦無嫌焉

王良以病歸一歲復徵至榮陽病篤不能進道乃過其友人友人曰不有忠言奇謀而取大位何其往來屑屑不憚煩也遂拒之良慙自後連徵不應

楚王聘陳仲子爲相歸謂妻曰今日爲相明日結駟連騎食前方丈矣妻曰結駟連騎所適不過容膝食前方丈所甘不過一肉以容膝之安一肉之味而懷楚國之憂亂世多害恐先生之不保命也仲子悟與妻遯去爲人灌園

應曜隱於淮陽山中與四皓俱徵曜獨不至時人語曰商山

西滙外集

卷八

亂書補

六

四皓不如淮陽一老

成公成帝時人上出游問之不屈節上曰朕能富貴人能殺人子何逆朕對曰陛下能貴人臣能不受陛下之官陛下能富人臣能不受陛下之祿陛下能殺人臣能不犯陛下之法上不能屈

王莽徵故光祿大夫龔勝勝不食而死有老父來弔哭甚哀既而曰嗟乎蕙以香自燒膏以明自銷龔生竟天天年非吾徒也徑趨而出莫知其誰

邱訢字季春扶風人也傲世不與俗羣郡守召之見曰明府

欲臣訴耶友訴耶師訴耶明府所以尊寵人者極於功曹所以榮祿人者已於孝廉一極一已皆訴所不用也守不能屈

季厥清貧有遠操王丞相欲辟爲府掾厥得賤命笑曰茂宏乃復以一箇假人

虞仲翔在東吳曹操欲辟之虞聞之歎曰盜跖乃以餘財汙良家耶

邴原齊人公孫度屢聘之不起歎曰邴君雲中白鶴非燕雀之網所能羅也

西瀛外集

卷八

亂書補

十九

何準高尚寡欲兄充爲驃騎將軍勸其仕準曰第五之名何減驃騎

何胤黠之弟世稱黠爲大山胤爲小山慕曾稽之勝棄家而往詔起光祿大夫遣司馬王果勸駕謂果曰卿何不表留同我隱果曰不聞此例胤笑曰檀弓兩卷皆言物始何必有例

何允隱居若耶山雲門寺武帝詔爲光祿大夫允曰吾年已五十七月食四斗不盡何容復有宦情

郭瑀隱於臨雍谷張天錫禮徵之使至瑀指翔鴻示之曰此

烏安可籠哉

阮孝緒不交當世所居室惟一鹿牀竹木環繞時人造之未嘗見也劉訐一造孝緒卽應以神交訐族兄某亦履高操都下謂之三隱

翟湯操行廉介耕而後食王導庾亮屢薦不起子莊亦高士莊子矯矯子法賜克世其德時稱潯陽四隱

孔滔之除著作佐郎太尉參軍並不就與戴顓王宏之及王敬宏等爲人外之游

王素屢被徵辟聲譽甚高山中有蚊蟲聲清長聽之使人不西漚外集卷八

亂書補

厭而其形甚醜乃作蚊賦以自況

三

陳易字體常築室於興化之蔡溪巖不下山者二十年與沙門有需親善人或就見亦無忤也蔡子由以八行薦之易以啟事謝云心若死灰枉被吹噓之力身如槁木難施雕琢之功又云昔在儒門雖粗修夫八行晚歸祖道惟務於一心心旣已忘行復何有後復薦於朝終不起

魏衍彭城人以學行見重於鄉里自以爲不能爲王氏學因不事舉業家貧甚名所居之軒曰曲肱軒自號曲肱居士張俞於泰定間嘗獻書朝廷天下由是知名然不喜仕避隱

於青城山白雲溪時樞密田况守成都與詩曰深慙蜀太
守不及採芝人

蘇雲卿廣漢人與張魏公浚爲布衣交紹興閒結廬南昌之
東湖灌園織履自給人稱曰蘇翁浚爲相訪知所在馳書
函金幣屬洪州漕帥禮致之翁力辭不可期以詰朝上謁
比遣使迎之則書幣不啟家具如故翁已逝矣

羊祐嘗與從弟琇書云既定邊事當角巾東歸故里爲容棺
之墟以白土而居重位何能不以盛滿見責乎疏廣是吾
師也

西澗外集 卷八 魏書補

三

張翰因秋風起思吳中菰菜蓴羹鱸魚膾曰人生貴適意何
能羈宦數千里以邀名爵乎謂郡顧榮曰夫有四海之名
者求退良難吾本山林閒人無望於時子善以明防前以
智慮後榮執其手愴然曰吾亦與子採南蕨飲三江水耳
謝安優游山水以敷文析理自娛

王述少與羲之齊名而羲之輕述由是情好不協及述爲揚
州刺史檢察會稽郡王者疲於簡對羲之恥之遂稱疾去
郡於父母墓前誓曰自今之後敢渝此盟貪冒苟進是有
無尊之心而不子也

陶淵明爲彭澤令在官八十日郡遣督郵至應束帶見之歎
曰吾豈能爲五斗米折腰向鄉里小兒耶即日解印綬去
王秀之爲晉平太守至郡期年謂人曰此邦豐穰祿俸常充
吾山資已足豈可久留以妨賢路上表請代時人謂王晉
平恐富求歸
張欣泰改領河東內史武帝召還都屏居家巷置宅南岡不
面接松山召弩射雉縱情閒放

賀知章乞爲道士還鄉里詔賜鏡湖剡川一曲晚節尤放誕
遊游鄉里自號四明狂客

西滙外集

卷八

亂書補

三

鄭薰既老號所居曰隱巖蒔松於庭號七松居士

白樂天致仕與香山寺僧如滿結香火社每肩輿往來白衣
鳩杖號香山居士

元德秀爲魯山令歲滿筭餘一緘遂駕柴車去愛陸渾山水
佳乃居焉家無僕妾歲飢日或不爨人以酒肴從之不問

賢鄙皆爲酣飲

司空圖有先人別墅在中條山之王官谷泉石林亭頗稱幽
栖之趣日與名僧高士游詠其中嘗爲休休亭記量才一
宜休揣分二宜休耄且賸三宜休又少而情長而率老而

迂是三者皆非濟時之用又宜休也

楊玠靖恭諸楊也還政天子婆娑田野以多言數窮不如守
中著守中論

趙閱道休官歸三衢作高齋居之與鍾山佛慧禪師爲方外
友

歐陽公致仕居穎衣道服以琴棋書酒集古碑爲五而自賞
其一稱六一居士又爲傳以自序

李公麟既歸老肆意於龍眠山巖壑間雅善畫自作山莊圖
爲世寶傳

西澗外集

卷八

亂書補

三

崔鶯調績溪令移病歸始居郊城治地數畝爲娑娑園屏處
十餘年人無貴賤長少悉尊師之

鄭俠罷歸餘一椽拂子自稱一拂先生

錢若水爲舉子時見陳希夷於華山希夷曰明日當再來若
水如期往有一老僧與希夷擁地鑪坐僧熟視若水久之
以灰簪畫灰作做不得三字徐曰急流中勇退人也若水
後登第爲樞密副使年才四十致政

張乖厓公素善陳搏嘗謂搏曰欲分華山一半住得無搏曰
餘人不可先輩則可及別搏以宣毫十枝白雲臺墨一劑

蜀箋一角爲贈公曰會得先生意取某入闈處去後尹蜀
乘傳過華陰寄搏詩曰性愚不肯林泉住強要清流擬致
君今日星馳劍南去回頭慙愧華山雲及自成都召還復
寄詩云世人大抵重官榮見我西歸夾路迎應被華山高
士笑天真喪盡得淨名
貴溪高明以都御史致仕因討上杭賊復起用事旋納符敕
歸自言孔幾有三宜去司空圖有三宜休吾有五宜退因
號五宜居士

洪武間錢宰被徵至京暇日微吟曰四鼓鼕鼕起着衣午門
西漚外集

卷八

刻書補

三

朝見尙嫌遲何時得遂田園樂睡到人閒飯熟時察者以
聞明日文華殿朝畢帝曰昨好詩然朕何嘗嫌汝何不用
憂字宰悚謝未幾遣還

商容有疾老子曰先生無遺教以告弟子乎容張口曰吾舌
存乎曰存吾齒在乎曰亡知之乎老子曰非謂剛亡而柔
存乎容曰噫天下事盡矣

孫叔敖將死戒其子曰王數封我矣吾不受也我死王則封
汝必無受利地楚越之閒有寢之邱者以其地不利而名
惡荆人畏鬼而越人信穢可長有者其惟此也叔敖死王

果以地封其子而子辭請寢之邱故至今不失孫叔敖之
智知不以利爲利矣知以人之所惡爲己之所喜此有道
者之所以異於俗也

范柏年初爲州將劉亮使出都咨事見宋明帝帝言及廣州
貪泉因問卿州復有此水否答曰梁州惟有文川武鄉廉
泉讓水又問卿宅何處曰臣所居在廉讓之圃

晉陸喜有校論品格篇曰或問予薛瑩是國士之第一者乎
答曰以理推之在乎四五之間問者愕然請問答曰夫孫
皓無道肆其暴虐若龍蛇其身沈默其體潛而勿用此第

西澗外集

卷八

列書補

三五

一人也避尊居卑祿代耕養元靜守約冲退澹然此第二
人也侃然體國思治心不辭責以方見憚執政不懼此第
三人也斟酌時宜在亂猶顯意不忘忠時獻微益此第四
人也温恭修慎不爲諂首無所云補從容保寵此第五人
也過此以往不足復數

伏湛自伏生以後世傳經學清靜無競故東州號爲伏不鬪
杜恕著家誠道張子臺視之似鄙樸人然其心中不知何者
美好作人如此自可不富貴禍從何來

高允與游雅同樂相友雅嘗曰喜怒者有生所不能無也而

前史載卓公寬中文饒洪量褊心者或弗之信余與高子游處四年矣未嘗見其是非喜愠之色不亦信哉

江祐謂王安曰江夏王鋒有才行亦善能匿跡以琴道授羊景之景之著名而江夏掩能於世非惟七絃而已百氏亦復如之鋒聞歎曰江祐遂爲混沌畫眉欲益反蔽耳

桓溫登何琦縣界山喟然曰山南有人焉何公眞止足者也郭林宗謂劉儒口訥心辨有圭璋之質謝仁祖言庾赤玉胸中無宿物

劉尹稱王長史性至通而自然有節

西滙外集

卷八

劄書補

三

王長史道江道羣人所應有不必有人所應無己必無時人目庾中郎善於託大長於自藏

許元度言琴賦非至精者不能與之析理劉尹其人非淵靜者不能與之閑止簡文其人

劉季和言苟令君至人家坐處常三日香

文中子言達人哉山濤也多可而少怪

溫彥博曰劉伶何人也予曰古之闕闕人也

薛收問仲長子光予曰天人也收曰何謂天人予曰眇然小乎所以屬於人曠哉大乎獨能成其天

管輅嘗謂人曰吾與劉頴川兄弟語使人神思清發昏不假寐此外殆白日欲寢矣

劉尹云清風朗月輒思元度

黃叔度嘗云吾時月之間不見黃叔度鄙吝之心已復生矣王存字正仲性寬厚平居恂恂不爲詭激之行至其中之所存確不可奪司馬光嘗曰竝馳萬馬中能馭足者其王正仲乎

蘇源明言吾不幸生衰俗所不恥者識元紫芝也房瑄言見

紫芝眉宇使人名利之心都盡

西滙外集

卷八

列書補

七

孔文仲熙寧初詔舉賢良上朝策之文仲對九千餘言力排王安石安石怒奪其官既卒蘇軾拊其棺曰舉世尙軟熟求勁直如經父者不可得矣

黃魯直稱周茂叔胸懷灑灑落如光風霽月

文潞公稱文與可襟韻灑落如晴雲秋月塵埃不到

黃潛足不登鉅公勢人之門其清風高節如冰壺玉尺纖塵

弗汗

劉安世凡投荒七年所至皆陰惡地蘇軾稱爲鐵漢

蘇序衣食稍有餘輒費用或以乎人以此困窮厄於饑寒者

數矣然終不悔旋復有餘則曰吾固知此果不能困人也
楊秉嘗曰我有三不惑酒色財也

林逋嘗曰逋世間事皆能之惟不能擔囊與着棋

子瞻嘗自言平生有三不如人謂着棋喫酒唱曲也

康節先生喜飲酒命之曰太和湯所飲不多微醺而罷故其
詩曰性喜飲酒飲酒微醺飲未微醺遂及浩歌浩歌不已
無可奈何

蕭琛嘗言少壯三好音律書酒年長以來二事都廢惟書不

廢

西澗全集

卷八

魏書補

天

李璣之於經史百家無不究覽嘗謂人曰我所以好書者非
求身後名但異見異聞本心所願蓋天性然豈爲身名勞
七尺也

李永和杜門卻掃棄產營書手自刪削每曰丈夫擁書萬卷
何假南面百城

張無垢謫居橫浦其寢室有短牕每日昧爽輒抱書立窗下
就明而讀如是者十四年洎北歸窗下石上雙趺之跡隱

然

范文正少學於府庠同舍有病者文正親爲調藥病亟屬文

正曰吾無以報于平生有一術游遠方未嘗窮乏者術之力也今以遺于因投一裏方書小冊文正不得已納之未嘗啟視後得其子還之封識如故

鄭遨與道士李道殷羅隱之友善世目爲三高士遨種田隱之賣藥道殷有釣魚術釣而不餌又能化石爲金遨嘗驗其信然而不之求也

蘇祐嘗游成都有道士見之屏語曰少年有純德非我莫知子我能以藥變化百物世方亂可以此自全祐曰吾不願學也道士曰吾行天下未嘗以此語人自以爲至矣子能不學又過我遠甚遂去不復見

西滬外集

卷八

列書補

完

游雅以災異問高允允曰知之甚難既知後恐漏洩不如不知也天下至理甚多何遽問此

周奕金齒人遇一丹士欲以術授之奕曰內丹何如寡欲外丹何如節用時人以爲名言

或問晦庵何不學堯夫先知之術曰我所知者惠迪吉從逆凶謙受益滿招損耳

自至和嘉祐以來覺者多以術名天下獨王平甫不喜之嘗語人占卜本於前知而卦影驗於事後何足問耶

明道先生嘗憇一僧寺夜聞察察有聲命火燭之乃鼠於佛
臍中啣一書欲出先生取視之乃丹書也卽手鈔訖而納
舊本於故處召塑工補其孔先生後如其法煉之月餘人
見其屋有光以爲火也競趨撲之至則非也先生遂不復
煉試以將成之丹塗石輒成金或諷先生服之先生曰吾
腹中安可着此

楊慈湖嘗謂真西山曰希元有志於學顧乃不能忘富貴利
達何也希元愕然不知所謂慈湖曰子嘗以命訊日者故
知之夫必去是心而後可以語道希元曰先生於某可謂

西滬外集

卷八

列書補

三

愛之深而教之篤矣

劉卞功濱州人徽宗賜號高尚先生嘗曰常人以嗜欲殺身
以貨財殺子孫以政事殺百姓以學術殺天下後世吾無
是四者豈不快哉

講道學者不可專立道學門戶使人望而畏焉嚴君平賣卜
與子言依於孝與臣言依於忠與弟言依於弟終日講學
而無講學之名士大夫不可不知此意

倪思父鋤經堂述五事靜坐第一觀書第二看山水花木第
三與良朋講論第四教子弟讀書第五

趙季仁謂余生平有三願一願識盡世間好人二願讀盡世
間好書三願看盡世間好山水余謂盡則安能但身到處
莫放過耳

王戎多殖財賄常若不足家有好李賣之恐人得其種恆鑽
其核其從子婚予一單衣後更索之

衛展爲江州刺史有知舊人投之都不料理惟送王不留行
一斤李宏度聞之曰家舅刻薄乃復驅使草木

何曾日食萬錢猶云無下箸處

段文昌富貴後打金蓮花盆盛水濯足或規之答曰人生幾
西滬外集卷八

統書補

三

何要酬生平不足也

劉穆之貧時從妻兄江氏乞檳榔江曰檳榔消食君苦飢何
須此後尹丹陽以金盤盛斛許誇示之

王藍田性急嘗食雞子以筯刺之不得便大怒舉以擲地雞
子於地上周轉未止以屐齒蹶之不得復於地取納口中
齧破吐之

濟陰王思性急常執筆作書蠅擾筆端驅去復來如是再三
起遂不得遂取筆置地蹋壞之

謝宏微至性寬博未嘗與人有牾末年嘗與友人棋友人西

南棋有死勢一客唱言西南風急或至覆舟其人悟而救之宏微大怒投局於地識者覺其有異未幾果卒

王平子形甚散朗內實勁狹劉琨謂以此處世難得其死後果爲王敦所害

劉諒爲湘東王所善湘東眇一目一日與諒共游江濱歎秋望之美諒曰今日可謂帝子降於北渚湘東曰卿言目眇眇而愁子耶由此嫌之

江祏常與弟祀劉渢劉宴俱候謝朓朓曰可謂帶二江之雙流祏不堪又祏嘗詣元暉元暉言有一詩呼左右取旣而

西渚外集

卷八

劄書補

三

復停祏問其故云定復不急祏以爲輕己後遂構害元暉令狐綯嘗以舊事訪於温庭筠庭筠答曰事出南華經非僻書也相公變理之暇時宜覽古綯媿甚奏庭筠有才無行不許登第遂軾軻終身

李端行字聖達毘陵人崇寧間太學聲名藉甚丁亥歲詣路貢士試李士英作魁聖達第二意不平之嘗曰天下清氣無南北之異但吳中清氣十分鍾於人河朔清氣被鵝梨占了八分以士英河南人也士英銜之後士英拜相聖達坎壤矣志而死

黃庭堅與趙挺之同在館閣庭堅素輕趙嘗曰吾鄉最重
澗筆每一誌文成則太平車載以遺之庭堅曰想都是蘿
蔔瓜薑耳趙銜之切骨排擠不遺餘力卒致宜州之貶
孟顛事佛精懇而爲謝靈運所輕嘗語顛曰得道須慧業丈
人生天當在靈運前成佛必在靈運後顛深憾此言

盧多遜素與趙韓王不協趙爲樞密盧爲翰林學士一日偶
同奏事上初改元乾德因言此號從古未有韓王從旁稱
贊盧曰此僞蜀時號也帝大驚令檢史冊視之果然遂以
筆抹韓王面曰爭得如他多遜韓王經宿不敢洗面翌日
西滬外集 卷八 魏書補

奏對帝方命洗去自此隙日深以及於禍

嵇康嘗與向秀共鍛於大樹下鍾會往造焉康不爲之禮而
鍛不輟良久會去康曰何所聞而來何所見而去會曰聞
所聞而來見所見而去會以此憾之

元和初有天水趙雲客游鄜時過中部縣縣寮有讎適吏檢
一囚至其罪不甚重雲勸加刑於是杖之二十累月雲出
塞行及蘆子關道逢一人邀過其居命酒旣而曰君省相
識否雲曰未嘗此行實昧平昔乃曰前月中部遭罹橫罪
與君素無仇隙爲君一言致被重刑雲遽起謝之其人曰

吾望子久矣豈意於此獲雪乃命左右拽入一室室有大坑深三丈餘中貯酒糟數十斛剝去雲衣推雲於中飢食其糟渴飲其汁且夕昏昏幾一月乃出之使人蹙額採振支體手指肩髀皆改於舊提出風中忽然疑定至於聲韻亦改因以爲賤隸

吳興吳規頗有才學邵陵王綸引爲賓客綸牧鄆藩張纘出之湘鎮路經鄆綸餞之南浦纘見規在坐意不能平忽舉杯曰吳規此酒慶汝得陪今讎規尋起還其子翁孺見父不悅問而知之因氣結爾夜便卒規憤哭信次之聞亦殞

西滙外集

卷八

亂書補

十四

規妻深痛夫子翌日又亡時人謂張纘一杯酒殺吳氏三人

賀若弼父敦臨死之日令弼吐舌以錐刺之流血泣告曰吾以舌敗汝可戒言敦死弼亦以言爲煬帝所殺

潘岳父此爲瑯邪內史孫秀爲小史秀狡黠自喜岳常撻辱之及趙王倫輔政秀爲中書令岳於省內謂秀曰孫令猶憶曠昔周旋否秀曰中心藏之何日忘之岳於是自知不免

周矩爲殿中侍御史大夫蘇味道待之甚薄屢言其不了事

矩深以爲恨後味道下獄勅矩推之矩謂味道曰嘗責矩
不了事今日了公事也好答辨味道坐誅

丁謂出寇準門至參政事準至謹嘗會食中書羹汗準鬚謂
起徐拂之準笑曰參政國之大臣乃爲官長拂鬚耶謂甚
媿之

陳萬年病召其子教誠於床下語至夜半咸睡萬年大怒咸
叩頭謝曰具曉所言大要教咸諂也

王融自恃人地三十時望爲公輔夜直中書歎曰作此寂寂
使鄧禹笑人

西滙外集

卷八

劄書補

三五

蘇舜元爲京西轉運使在許州常快快語親識云人生稀至
七十而吾乃於許州過了二年蘇易簡罷參政以禮部侍
郎知鄧州方逾壯歲而其心鬱恨不勝閒冷之歎移書於
舊友曰退位菩薩難做

鄧綰除集賢校理檢正中書房孔目鄉人在都者皆笑且罵
綰曰笑罵從汝好官須我爲之

梅詢晚年病足嘗撫其足而詈曰是有鬼使吾不得至爾
府者汝也

堯元王嘗敬禮穆生每置酒嘗爲設醴及王戊卽位常設後

忘設焉穆生退曰可以逝矣醴酒不設王之意怠楚人將
鉗我於市稱疾臥申公與白生強起之穆生曰君子見幾
而作不俟終日遂謝病去申公白生獨留王戊稍淫暴與
吳通謀二人諫不聽衣之赭衣使杵臼舂於市申公愧之
歸魯教授不出門

沈約藏書十二萬卷然心僻惡聞人一善如萬箭攢心

呂絳者蔡京之門人蔡罷呂送至長沙乘閒問云公高明遠
識亦知國家之事必至於斯乎答云非不知也將謂老身
可以幸免

西滙外集

卷八

紀書補

三六

南陽翟道淵與汝南周子南少相友共隱於潯陽庾太尉說
周以當世之務周遂仕翟秉志彌固其後周詣翟翟不與
語周既仕而不稱意中宵歎曰大丈夫乃爲庾元規所賣
一歎遂疽發背而卒

范雲初爲陳武帝屬官武帝九錫之命在旦夕雲忽感寒疾
恐不獲與慶事召徐文伯診視以實懇之曰可使卽愈乎
文伯曰欲愈甚易恐二年後不復起耳雲曰朝聞道夕死
猶可况二年乎文伯乃以火燒地布桃葉設席置雲其上
頃刻汗解裹以溫松翌日而瘳雲喜甚閱二年果卒

尹穉博學工文與陸務觀同賜出身言行有法又通世務時
論翁然後乃附湯思退力排張魏公公論始薄之貶嶺南
蒙思北歸周益公與之善謂益公曰某三十年閉戶讀書
養得少名望思之不審所得於彼者幾何而破壞埽地雖
悔無及益公每舉以爲士大夫戒

常秩字夷甫歐公詩所謂常處士也好治春秋凡著書數十
卷自謂聖人之道在是矣旣而王介甫以右正言直史館
召之遂起而丞相不好春秋遂盡諱所學熙寧六年兩河
荒歉有旨令散苗本錢權行停閣人戲秩曰公之春秋亦
西滬外集 卷八 劄書補
權停閣乎秋色赭

三

晁以道與陳叔易俱隱嵩山叔易被召出山以道作詩云處
士何人爲作牙盡攜猿鶴到京華故山巖壑應惆悵六六
峯前只一家以道後亦出山人反以此詩嘲之

歐陽公在政府將引去先以一詩寄常秩曰笑殺汝陰常處
士十年騎馬聽朝雞旣而公亦出山有無名子改前詩作
秩寄歐公詩曰笑殺汝陰歐少保新來處士聽朝雞

上丹田泥丸神之舍中丹田絳宮氣之舍下丹田關元精之
舍下丹田在脾臍兩腎之間臍腎爲人受命之始中丹田

在兩乳間所謂膻中氣海也

氣之謂息息以自心爲義自者從也氣從乎心心住則氣住
心行則氣行

心者神之舍眼者神之牖口者氣之關鼻者氣之竇腎者精
之藏尾閭者精之路人多思多視則神散多言多息則氣
耗多色欲則精竭故當斂思收視以養神闕言調息以養
氣堅閉下元以養精人之所以憔悴枯槁者心使之然也
一念未已一念續全無暇豫之時宵之寐也亦如是而神
不存矣

西瀝外集

卷八

雜書補

三

凡欲身之無病必先正其心不使氣索則心無病心無病
則餘臟腑雖有病不難療也外之九竅亦無由受病也

天清地寧人物營營名利奔迫喜怒哀交爭思永厥壽彌喪厥
身何如絕欲端守爾精

人大言我小語人多煩我少記人忿恨我不怒不以人事累
意澹然無爲是爲長生之藥

養生之法不憂爲先心體憂鬱必有情根隱伏於內蟲之既

生木果味敗

腎爲作強之官得所養則骨髓不枯神氣自足

道以精爲寶寶持宜慎密施人則生人留己則生己結嬰尙
未可何況空廢棄損不須多衰老病已矣
言行有乖仁恕其傷元氣在無形如是者鬼殺之酒色伐人
神隨其傷元氣在有形如是者病殺之
油盡燈滅髓竭身亡添油鎗燄補髓身強
火隨欲起煽動精室精雖未洩而已離位若復忍而蓄之必
化膿血而成毒也

已渴方飲已飢方食五味亦不宜偏嗜偏則生疾

脾喜燥而惡溼

西滙外集

卷八

剋書補

三九

不以脾胃煖冷物熟食

有人見牧童驅羊於瘠地牧之謂曰彼澤地草美何不就牧

童曰草美則易食瘠地之草羊必細嚼惟細嚼乃得肥也

道書極貴口中津液謂之金醴玉漿無事靜坐嗽而自嚥不

但灌溉五臟亦能止滅心火令不飛燄乃旣濟之理也然

非淡素自茹寂然自攝者正恐焦吻乾喉無唾可嚥耳

凡物誘人色爲甚人爲誘所入目爲甚故養神之道全在收

視收視者非瞑目不視蓋不欲盡視也如所謂平視含光

之意語云平視則心柔最有味

儉於視可以養神儉於言可以養氣儉於心可以出生死
淫則精漏而魂疲奢則真雜而魄穢

精神不運則愚血脈不運則病

流水不腐戶樞不蠹形氣亦然形不動則精不流精不流則
氣鬱處頭則爲風處耳則爲聾處目則爲矇處鼻則爲齇
處腹則爲脹處足則爲痿爲瘳

攝生不可不知冬許晚絮春許徐褫

服食導引之餘有二事乃梳頭洗腳也郭尙賢云梳頭洗腳

長生事臨睡之時小太平

西滬外集

卷八

雜書補

早

夜半不臥則血不歸心

半醉酒獨自宿軟枕頭煖蓋足能息心自瞑目千金方睡訣
也

難經說老人寤而不寐少壯寐而不寤以謂少壯者血氣勝
榮衛之行不失其常故晝日精夜不寤也老人血氣衰榮
衛之道澇故晝日不精夜不寐也大抵晝作夜息者人之
常精神姿稟雖各不同然用之得其常則於其不用之時
亦得其常苟用之不得其常則一切反是矣衰老之人經
事既多遺變不少筋骸彫敝目眊耳重一毫之營如負太

華度前揣後於利害之表商是權非於子奪之閒憂未朕
而已憂患已銷而猶患眾人皆息己獨不休所以正晝昏
昏夜反無寐此蓋精神用反其常而寤寐亦反其常也年
少之人志剛氣銳神壯胆粗鬪力則矜力有餘角智則智
慮無勸劃然而動屹然而止事之未至利害不足動其念
事之既往是非無足留其懷眾休而休眾作而作所以晝
日常精夜則常寐蓋精神用得其常而寤寐亦得其常也
白樂天司馬君實皆明哲過人而樂天有詩云年衰自無
寐不是守庚申温公有詩云蘇秦六國印力取鴻毛輕白
亦當是精神疲敝而然

老人血氣衰耗不必別求衛生之術但朝粥一碗夕鐙一盞
作在家僧行徑常持屨居士空諸所有四字便是上乘大
丹若草木金石之類豈能延駐耶

有義理以養其心則雖老而神明不衰苟爲不然則昏於參
養敗於戕賊求老且不能尙欲其勿衰耶

凡人無病不宜服藥藥氣偏有所助令人臟氣不平

世言不服藥勝中醫此雖不可通行然病無甚苦與其爲庸

醫敗之誠不如不藥也

病與藥值惟用一物攻之氣純而效速今人不善診脈又不善處方一方或用藥七八味甚至十餘味豈知一藥得力因爲他藥牽制其力便不專此難愈之驗也

病有回不治飲食無度寢興不時縱恣怕活不自珍重一也多服湯藥滌盪脾胃元氣漸耗二也室人聒噪耳聾成荆棘三也以死爲苦與六親眷屬祇覺難割難捨四也至於怨天尤人廣生懊惱今日豫愁明日一年常計百年窘若拘囚毫無瀟灑之趣尤病中所切忌者

西滙外集

卷八

劄書補

聖

身不習勞則病生心無所寄則妄馳而病亦生

慎風寒節嗜欲是從吾身上卻病省憂愁蠲煩惱是從吾心上卻病

道士陳彥真常教人以其心寄之膽中使心火下注丹田如是坐臥起居不廢行之既久覺腹閒如火則舊疾盡去矣

郭康伯遇神人授以衛生之偈云自家有病自家知身病還將心藥醫心若靜時身亦靜心生還是病生時

鄺子元由翰林外補常從僚無聊遂成心疾或曰真空寺有老僧不用符藥針灸能治此疾子元往叩之僧曰貴恙成

於煩惱煩惱成於妄想妄想之來其有三或追憶數十年前榮辱恩怨悲歡離合及種種閒情此爲過去妄想或事到眼前三翻四覆猶豫不決此爲現在妄想或期望日後榮辱與夫一切不可必成不可必得之事此爲未來妄想三者忽生忽滅乍去乍來禪家謂之幻心能照見其妄斬斷念頭禪家謂之覺心又曰貴恙又原於水火不交凡溺愛冶容而作色荒是爲外感之欲無其事而有其兆或成宵寐之變是爲內生之欲二者之欲綢繆染着皆消耗元精若能離卻則腎水滋生可以上交於心至若思索文義忘其寢食謂之理障經營職業過於勤勞謂之事障二者雖非人欲亦損性靈若能驅遣則心火不至上炎可以下交於腎故曰塵不相緣根無所偶反流全一六用不行又曰苦海無邊回頭是岸一切有爲應作是觀子元深服其言獨處一室埽空萬緣靜坐月餘而疾愈

李文節搆枯木庵死心寮以爲養痾之所歐陽公晚年有疾不服藥惟枯坐習忘以卻之

戒慎必恭恭則壽

氣之溫和者壽質之慈良者壽量之寬宏者壽貌之厚重者

壽言之簡默者壽

鶴所以壽者無死氣於中也蝸藏於殼烈日經年而不枯者必有所以不枯者在也

仁者壽生理完也嘿者壽元氣足也拙者壽元神固也一要壽靈臺虛 做絕塵竇二要壽脫離恩愛如避寇三要壽橫逆之來歡喜愛四要壽凡事莫把眉頭皺五要壽飲食切忌滋味厚六要壽坐臥謹防風透漏七要壽儉以安貧休厭舊八要壽浮名莫與人相鬪九要壽對客忘言娛清書十要壽摘取善言銘座右

西滬外集

卷八

雜書補

四

文潞公致仕入對年八十矣神宗見其康強問卿攝生亦有道乎公對無他臣但能任意自適不以外物動氣不敢做過當事酌中恰好便止上以爲名言

右補闕正己致仕豫製棺題永息庵置諸寢室人勸移之儼地曰吾欲見之常作死想減除貪愛耳

沈麟士篤學不倦遭火燒書數千卷年過八十猶聰明燈下鈔書復滿數十篋人以爲養身靜默之所致也

梁翰朱昂楊大年同在禁掖楊未三十而二公已老數見欺侮梁謂之曰公勿侮我老此老亦將留與公耳朱背面搖

手謂宋曰勿與勿與大年果不及五十而死

寇萊公少年富貴尤好夜晏雖寢室亦然燭達旦杜祁公在官未嘗然官燭油燈一炷淡然相對二公皆名臣而奢儉不同然祁公壽考終吉萊公晚年有南遷之禍雖其不幸亦可爲戒

太學二十人同年月日時生又同年發解過省二人約受相近差遣一人授鄂州教授一人授黃州教授未幾黃州教授死鄂州教授於樞前祝曰我與君生年月日時同出處又同君先捨我去使我今卽死已後君七日矣若有靈宜

西滙外集

卷八 亂書補

星

託夢以告我其夜果夢告云我生於富貴已享用過了故死君生於寒微未曾享用故生以此知人之享用亦不可過後鄂州教授官至典郡得其聞此警悟恐懼修省而然耶

歐陽公問一僧曰古之高僧有去來倏然者何今世之鮮也僧曰古人念念定慧臨終安得而散今人念念散亂臨終安得而定

王齊叟彥齡有絕才九流無所不通自推年命三十九果如其言臨終有頌云醉魂今夜不須尋請看武陵溪上月

傅奕常醉臥蹶然起曰吾其死矣因自爲墓誌曰傅奕青山白雲人也因酒醉死嗚呼哀哉

曾榮臨卒自爲贊曰宮詹非小六十非天我以爲多人以爲少易簀蓋棺抑又何求青山白雲樂哉斯耶

蜀人郭震任介李政相與爲莫逆之交游蕩不羈然皆才識過人震將死其友往問之側身欹枕而言其友曰子且正身震笑曰此行豈可復啖名哉雖平生談諧之餘習亦足見其臨死不亂也

程正夫作一棺題曰休息醉卽偃臥其中有詩云板屋蕭然

西滙外集

卷八

欒書補

哭

密四周愚人息矣聖人休百年恍惚真疑夢萬事紛紜已到頭從古有生都變滅卽今未死且夷猶幾輩有身非委

蛻此中無地着閒愁親朋斗酒勞相勸莫待遶臨土一邱司空圖豫爲壽域故人來者引之壙中賦詩對酌人或難之圖曰達人大觀幽顯一致非止暫游此中公何不廣哉

范石湖重九日行營壽藏之地賦詩曰家山隨處可松楸荷鍤攜壺似醉劉縱有千年鐵門限終須一箇土饅頭

戒之哉勿多言多言多敗勿多事多事多害安樂必戒無行所悔勿謂何傷其禍將長勿謂何害其禍將大勿謂不聞

神將何人焰焰不絕炎炎若何涓涓不壅終爲江河鯨鯨
不絕或爲網羅毫末不扎將尋斧柯誠能慎之福之根也
曰是何傷禍之門也

重階連棟必濁汝真金寶滿室將亂汝神厚味來殃豔色危
身求高反墜務厚更貧閉情塞欲老氏所珍周廟之銘仲
尼是遵審慎汝口戒無失人從容順時和光同塵

知滿損而謙益驗弱生而強死無爲福先無爲禍始節其飲
食謹其容止愍而能散爲而不恃潔其心而穢其跡濁其
表而易其裏範暗室而整冠循覆車而易軌以道德爲甲

西澗外集

卷八

劉書補

七

胄以忠信爲劍履愛髮膚而不傷保室家以不恥

無道人之短無說己之長施人慎勿念受施慎勿忘世譽不
足慕唯仁爲紀綱隱心而後動謗議庸何傷勿使名過實

守愚聖所賦在湮貴不滓曖曖內含光柔弱生之徒老氏

戒剛強行行匹夫志悠悠故難量慎言節飲食知足勝不

祥行之苟有恒久久自芬芳

夕晦晝明乾動坤靜物稟乎性人賦乎命貴賤賢愚壽夭衰

盛諒夫自然冥數潛定性不可易體不可移巢者罔穴泳

者寧馳竹松寒茂桐柏秋摧闕里泣麟傳巖肖象馮衍空

歸千秋驟相健羨勿用止足可尙處順安時吉祿長享
舟有溺騎有墜寢有魔飲有醉食有饑行有蹙其甚皆可以
致斃在在無非危機其可如土偶木偶耶

圓行方止物之定質注之不已則溢高之不已則慄馳之不
已則躓引之不已則逸是以去之宜急

晝馳於想夜結成象起滅萬端盡屬處妄要拔前根並除後
障一鑑當空羣魔消喪

春秋責備賢者造物計較好人一點莫留餘滓十分成就全
身

西漚外集

卷八

劄書補

哭

勿謂不道天知人情勿謂杳冥神見人形心言意語鬼聞人
聲犯禁滿盈地收人魂

五根之端劇於毒龍五根如箭意想如弓

塵生便埽莫論醜好百年偶聚何苦煩惱太虛之中無物不
有萬事從寬其福自厚

初生墜地有何煩惱放聲一哭煩惱來了自幼而壯而衰而
老拂意者多如意者少不能耐煩愈煩愈惱煩惱之毒甚
於熏燎熬熬煎煎爆爆炒炒身心兩損百無一好何不丟
開何不拉倒冤哉苦哉煩惱自討

數間茅屋三殮菜粥可以容膝可以裹腹不甘淡薄不思節縮因而妄想耿耿逐逐受人睚眦聞人謗讟未是深讐軌思報復獵犬喜噬鬪牛喜觸爭強校弱人也而畜言念世人甘心自毒一團意氣百般嗜欲縱如所願未便是福何況不能益如拂鬱人生實難人壽甚促我有數言請君佩服以屈爲伸以歉爲足安貧不貧忍辱不辱

龍不隱鱗鳳不藏羽網羅高張去將安所飢馬在廐漠然無聲投芻其旁爭心乃生魚質龍文似是而非遭水而喜見獯卽悲爭魚者濡爭獸者趨處事忌擾作人忌巧居室忌

西滬外集

卷八

劄書補

聖九

好著書忌早謹本詳始敬小慎微志如死灰形如委衣七尺何物百年何事忘卻主人餘都不是同日受霜蔽者不傷與人以實雖疎亦密與人以虛雖戚亦疏見怪不怪其怪自敗當斷不斷反受其亂勿恃久安勿憚初難日悔昨月悔朔

此心難足足於寡欲人生不開閒在信天小勇叫噪大勇色笑真勇沈毅神勇無氣避害不若避名息影不如藏形終身讓路不枉百步終身讓畔不失一段

世人最好勝達者戒爭競有眼非不見有耳非不聽性靈不

妨呆口快不妨鈍甯屈不求伸甯退不求進防禍怕惹禍
事事一謹慎知福會享福念念常清淨神完弱亦強氣足
老仍嫩平生大自在到死無死症

勞生百年內患有入之形一身歸虛無萬念偏營營雖有賢
哲人誰與憂患并已矣何所逃安之以無爭

家雖日漸貧猶未苦飢凍身雖日漸老猶未苦病痛眼逢鬧
處合心要閒時用既得安穩眠亦無顛倒夢

省事兼寡言能使心無競病亦不迎醫將書養性命

陶公常乞食顏公亦求米古來賢達人所遇猶如此况我與

西滬外集

卷八

雜書補

五

時違凍餒固其理且當守故居量力營薪水
貴賤皆有營百年誰得閒但使妄念淨卽爲善閉關

寸有長尺有短雙輪馳不可挽我所急天所緩

少飲酒多啜粥少羣居多獨宿少開口多閉目少取名多忍

辱

常居勞故得逸常居忍故得遂常居束縛故得蕭散常居不
足故得有餘常居勉習故得無不利

有事故應事應了便無事若有厭事心如何了得事無事故
靜坐靜坐原無事若還心自生便是自生事

耐貧賤易耐富貴難安勞苦易安閒散難忍痛易忍癢難
有時不妄用無時耐得窮便是陶朱公不消求他省事以清
心寡欲以寧神便是扁鵲醫不消請他一樹不妄伐一禽
學不亂殺便是活如來不消拜他明處不欺人暗處不欺心
善便是活閻王不消怕他

性明者欲滅嗜煩者氣昏

君子以心導耳目小人以耳目導心

知道者性其情不知道者情其性

形用事則神者亦形神用事則形者亦神

西滙外集

卷八

統書補

廉者常樂無求貪者常憂不足

速登者亟顛徐進者少患

靜者生門躁者死戶

道生於安靜德生於卑退福生於清儉命生於和暢

謹則無憂忍則無辱靜則常安儉則常足

學一分癡呆得一分快活守一分退讓得一分便宜

欲隨心生理隨心滅理固不能勝欲也危哉心也病從口入

禍從口出禍更有甚於病也危哉口也

凡快口者皆口孽也而其最不及檢者則無過於慢易之言

凡快心者皆心病也而其最不可萌者則莫甚於刻薄之念
看得身外透自然不慕浮名認得眼前真何用別尋樂地
都是意中事知足者仙境不知足者凡境都是眼前人能容
者生機不能容者殺機

愁

曠心壞一切善慈心降一切魔
事來風水相遭心定雷霆不入

心境澄澈有如秋月當空則天下自無可厭之事氣味冲融

西廂外集

卷八

魏書補

五

常似春風解凍則斯世自無可惡之人

一勺水便具四海水味世味不必盡嘗一輪月散作千潭月

光心光原宜獨朗

鄙吝既消白雲亦可贈答滓穢盡淨明月自來照人

隨時之內善救時似清風之消酷暑混俗之中能脫俗如淡
月之映輕雲

掃地白雲來才着功夫便起障鑿池明月入能空境界自生

靈

執相非真破相亦非真問世尊如何發付徇欲是苦絕欲亦

是苦在吾儒善自修持

繩鋸木斷水滴石穿學道者須是不已水到渠成瓜熟蒂落
得道者一任自然

口不含半粒肩不挂一絲來時如此而已晝祇飽三餐夜祇
眠八尺身外無所用之

一飽卽休身外黃金皆棄物暫間且樂世閒白髮不饒人

東海水沒有定波世事何須扼腕北切山不留隙地人生且

自舒眉

智無涯而難恬性有方而易適

西漚外集

卷八 魏書補

三

清人不假外境爲襟懷高士不以塵識染情性

虛其中者朝市不喧欲其中者巖谷不幽

舉世牽惹之勞無非名利一生和平之福端在慈祥

身便是幻幻時所化又是幻中之幻世便是夢夢時所見又

是夢中之夢

知性之情者不務性之所無以爲盡性也知命之情者不憂

命之所無奈何安命也

有德卽是有福無機卽是無禍因事卽是成事讓人卽是勝

人

脩短不在年齡趣永者一息千古寬窄不關境地神曠者環堵八區

紛擾固溺志之場而枯寂亦困心之境故學者當元默以存真體亦當曲暢以養圓機

內順己性當如紀消之養雞外順物性當如顏闔之養虎軀殼的我要看得破破則萬緣皆空而其心常虛虛則義理來居性命的我要看得真真則萬理皆備而其心常實實則物欲不入

事理因人言而悟者有悟還冇迷總不如自悟之了了意趣西滬外集

卷八

九書稿

蓄一

因境遇而得者有得還有失總不如自得之休休此心常看得圓滿天下自無缺陷之世界此心常放得寬平天下更無傾側之人情

於極易迷處不迷一生常醒於極難放處能放萬境皆寬擺脫得俗務便入名流滅除得物累直趨聖境水以濯垢自汙石以攻錯自糜

百慮輸一忘百巧輸一誠

致道者忘身養志者忘命

常想這點精靈到死後置之何所更看恁般面目在古時像

箇甚人

欲遇變無倉皇須是平時念念拿得定欲臨死無罣礙須是生前事事看得輕

一場閒富貴狠狠爭來雖得還是失百歲好光陰昏昏過了雖壽亦爲妖

生不枉神死不幽志

知至道者天不殺服元氣者地不滅

能於熱處思冷一世不受淒涼能於淡處求濃一生不落枯槁

西滙外集

卷八 魏書補

五

一

知費之爲省者善省者也而以省爲省者愚其費必倍知勞之爲逸者善逸者也而以逸爲逸者昏其勞必多知苦之爲樂者善樂者也而以樂爲樂者癡一苦不反知通之爲塞者善塞者也而以塞爲塞者拙一通必竭

善處身者必善處世不善處世者賊身者也善處世者必嚴修身不嚴修身者媚世者也

勤儉二字是窮人的回生丹寬厚二字是富人的敗毒散昨日之非不可留留之則萌芽復生而塵情終累理趣今日之是不可執執之則渣滓未化而理趣轉爲欲根

功名富貴直從滅處觀究竟則貪戀自輕橫逆困窮直從起處究由來則怨尤自息

緣橫逆而忿忿不可忍而可釋也釋之以二字曰何傷緣困阨而憂憂不可弭而可解也解之以二字曰何妨

龍可豢非神龍虎可搏非神虎故爵祿可餌榮名之輩必不可籠淡然無欲之人鼎餼可及寵利之流必不可加飄然遠引之士

治生勤儉者天不能貧立品尊高者天不能賤居心淡泊者天不能病制行謹慎者天不能殃

西滙外集

卷八 飢書補

五

處治世宜方處亂世宜圓處叔季之世宜方圓並用待君子宜寬待小人宜嚴待庸眾之人宜寬嚴互存

小門深巷巧安排沒有塵埃御有莓苔水光山色淨如揩山也悠哉水也悠哉東風昨夜送春來纔見梅開又見桃開一觴一詠迭相催詩是生涯酒是生涯

不將心火自熬煎行也安然坐也安然日高三丈我猶眠不
是神仙誰是神仙綠楊深處晝鳴蟬捲起湘簾放出鑪煙
荷花池館晚涼天正好談禪又好談元

扶輿清氣屬吾曹莫怪粗豪莫笑風騷算來名利總徒勞何

處爲高開處爲高一庭疎竹閒芭蕉風也瀟瀟雨也瀟瀟
木犀香裏臥吹簫且度今朝那管明朝

扁舟湖上放歌行確是浮生恰有閒情白鷗於我不寒盟漁
也逢迎樵也逢迎歸來風景逼心清雪滿中庭月滿中庭
一鑪槐火煖騰騰不看棋經便看茶經

西澗外集

卷八

魏書補

五

老學究語

老學究語二百二十七條蓋做呂氏小兒語而爲之者意相襲也例相沿也名則不相仍也其不相仍者何也無庸仍也近溪先生小兒語無一非小兒語新吾先生續小兒語則不純乎小兒語茲之老學究語有與小兒語近者亦有與小兒語不近者且小兒語者非得之小兒也託之小兒也老學究語者非託之老學究也實出於老學究也人爲老學究其人必迂語出於老學究其語必腐不能自掩其腐卽無庸自諱其迂也泛而觀之凡所云云多屬老生西滬外集卷八老學究語

庚

一

常談而其中往復低徊語重心長又似乎老夫灌灌此其所以迂所以腐也自知其迂自以爲腐人未有不迂之而腐之者其有不迂之而腐之者非老學究之所敢必也而要未始非老學究之所竊幸而厚望者也則亦姑存之以與小兒語參觀焉可也塾江李惺自識

四言

有禮則安無禮則危齊家以禮萬福之基
上下之分內外之限最宜謹嚴不可散亂
家長嚴正卑幼恭順善氣凝薰元吉大慶

不怕飢寒怕無家教惟有教兒最關緊要
有兒不教不如無兒教不以正何以教爲
善愛兒者不偏於愛偏於愛者兒受其害
望兒成立怕兒不才動其畏心絕其禍胎
松下生松柏下生柏近朱者赤近漆者黑
橫天塞海一箇孝字震古燦今一件難事
友以成孝孝必兼友薄兄弟者薄其父母
婦人之言非不可聽怕以長舌濟其陰性
枝枝葉葉一樹一根同宗共祖雖疎亦親
西滙外集 卷八 四言

貴盛富厚罕能百年不如貧賤其流涓涓
徇末忘本棄內營外所得者小所失者大
人之所欲非我所欲不求有餘自無不足
淡淡薄薄樸樸素素食不厭蔬衣不厭布
孝養父母有兒教兒眼前生計勿荒於嬉
祇圖佚樂定不快活能耐勞苦別無痛楚
日出而作日入而息第一等人自食其力
嬾人嬾病無藥可醫不癩不瘰情其四肢
身有所屬心有所繫若無執業何所不至
西滬外集 卷八 四言

奈

東倒西歪七顛八簸水性楊花萬難結果
年少力强急須努力錯過少年老來著急
民分爲四各技各藝欲善其事必致其志
祇怕不勤不怕不精祇怕無恒不怕無成
繩鋸木斷水滴石穿由來者漸祇是一專
天之生物可用者眾天之生人必有所用
生貧賤家當知自立生富貴家豈遂自逸
第一可醜坐享庸福酒囊飯袋行尸走肉
有穿有戴又醉又飽不怕過分專要愛好

一切器具色色精緻物盛人衰物堅人脆
高門廣廈以爲安宅屋是主人人卻是客
月不常圓日不再中泰則必侈侈則必窮
今之所享前之所積無奈癡兒不知愛惜
癡兒不癡乃翁實癡躬自積之何不散之
家有餘銀族有貧人廚有剩飯途有餓漢
不痛不癢一彼一此將心比心知己知彼
人到窮時老天也窮能拯人者能代天工
拙人守拙天之所憐你照看他他有二天

西滙外集

卷八 四言

三

正人守正天之所喜你帮扶他天也愛你
勿謂人窮由於不才正惟不才益覺可哀
勿謂人窮我亦不豐我縱不豐未是奇窮
濟眾固難要有所濟見人垂危烏能坐視
厚施固難不施不得千錢百錢亦可解厄
養人者田害人者錢錢之爲物人皆殉焉
出之自我一滴不漏取之於人惟嫌不穀
便是錙銖也覺有益眼孔太小心計太密
越有越貪不多不快益棉之時一錢難帶

我所應有有而不有留與兒孫從容消受
非所應有不可強索人既不願我亦何樂
非所應有不可隱取詭而得之是謂盜矣
蟻娘轉丸以糞爲香撲燈之蛾但見燈光
刀頭着蜜酒中置鳩心既甘之可餌可飲
欲因利熾利令智昏人爲利誘生入鬼門
敬人人敬自敬其身人生一世畏敬於人
漫說尊長漫說先達但是箇人總難抹煞
謙謙君子恭而有禮小人不然傲慢而已
西滙外集 卷八 四言
有意慢人人必難堪無心之慢亦討人嫌
必顛必蹶必傾必折侈然自肆夷然不屑
人不盡愚我豈獨賢如云富貴尤屬偶然
但有作用意量必深但有受用氣味必渇
被人看破祇爲自大被人料倒祇爲自小
人與人接斷難如意一箇單方總不動氣
愚人賤人儻或我慢卻要恕他他實愚賤
勢利中人儻或我慢勢利已耳又何足算
人之悍者我當思難人之黠者我當思患

偶爾牴觸亦事之常自取煩惱定要較量
我以為圓人以爲方方則方耳於圓何傷
人無可疑而我疑之疑鬼鬼現疑賊賊隨
彼此生疎何隙何覺覺隙之生由於暱近
愈理愈紛愈轉愈深不如罷了閉口閉心
肝氣易動心氣難平肝太心火自焚其身
芝蘭之生雜於蕞草鳳凰所止從以百鳥
是箇吉人一團和氣飲人以和令人自醉
樹樹有皮人人有臉見人破綻替人遮掩
西滙外集 卷八 四言 一
直者不直白者不白見人冤枉替人分別
視人之事如己之事既應承他有一無二
隨處度人一錢不費與子言孝與弟言悌
凡與人言詞氣從容規人勸人人也樂從
愛我譽我對我揄揚承以惶愧謝不敢當
說我不是道我不好虛心領受反而自考
汪汪之量海納百川皎皎之心日麗中天
天理良心常言如此昧了天良忍心害理
人之感人所入者深豈有異術祇是實心

實心實腸鬼也信你巧於騙人騙的自己
遇事生風七觜八舌他人之事於己何涉
無中生有胡說亂道嚼舌而死現眼現報
以計陷人人莫能脫惡之大者陷人於惡
助惡長惡小人之尤因風縱火火上澆油
樹怕剝皮人怕傷心冤家路窄無處躲身
凡蓄人者人反蓄之君子必慎慎其所施
諂人媚人行同市僧乞丐性情倡優體態
羞不知羞怪不爲怪但得人憐自以爲快
西滙外集 卷八 四言 一
勢利中人無所不有名教中人切須有守
何謂秀才何謂孝廉顧名思義能否無憾
一第一官何足爲榮俗眼俗口說是功名
功名二字談何容易功在天下名在後世
小用小效保惠一方有功可紀其名亦彰
果有經濟必有器局器局宏深自然拔俗
抱負在先功名在後隨地設施平時講究
不能則學不知則問恥於門人決無長進
兩眼要明明於認人不可狎者可宗可親

飢而食粥粥可省費困而讀書書可益智
以書益智智在明理理之大常禮義廉恥
見得理明信得命定膽壯氣足物皆退聽
何賤何貧祇要成人有品不賤有學不貧
不爲良相必爲良醫醫固可爲不如蒙師
人生百年始於齟齬不培其本必染邪症
聖賢之言百症俱詳不得良師不顯良方
書所云云歸到身心隨事指點入之也深
勤勤善導小子有造世多善人良師之效
西澗外集

卷八 四言

奎

十二時中莫欺自己最著緊處雞鳴而起

一有邪念立即斬斷斷了念頭再沒牽絆

非不自知無奈自恕恕一恕再走入邪路

自攻自治我不我容絕大智慧真正英雄

貪不如廉巧不如拙躁不如靜辯不如默

寧重勿輕寧緩勿迫寧厚勿薄寧寬勿窄

謹守三戒戒之在色戒之在鬪戒之在得

切須小心戰戰兢兢如臨深淵如履薄冰

五刑之屬三千罪莫大於不孝世俗不孝者五先要兒曹知道

外人不算同氣同氣祇此兄弟弟兄能有多少十箇八箇更好

一體分爲五指指頭或短或長長短無非手足弟兄切莫參商

兄弟親戚朋友失歡多爲讒言小人工於離間勿爲小人所謾

婦人兒子奴僕最多一面之辭輕聽必然惹禍禍來躬自當西滬外集卷八六言

之

父祖官大門高兒孫意氣自豪多少潭潭第七轉眼化作蓬蒿

前人縱有功德也難向人誇耀後人不及前人旁人說你不肖

讀書專習文字文字專求科第一心指望做官誤了許多子弟

做官非徒富貴有君有國有民若是一無好處不如做箇鄉人

子第先要醇謹醇謹自然端正少小便是聰明聰明不如愚
鈍

人生福澤之源端在精神純固縱有學問文章祇是深沈不
露

不容冒者才子不可居者名士一味輕薄顛狂桃花柳絮而
已

身非豢養不肥家非刻剝不富與其富也寧貧與其肥也寧
瘦

世重有貝之才財非無用之物愚人以之賈禍智者以之造

西滙外集

卷八 六言

七

福

錢多正好行善祇要積而能散積善也如積錢一文湊到一

串

放著好事不做反道善門難開開門也自容易有財豈患無

才

祇有錦上添花那有雪中送炭看破這般世情落得做箇鐵

漢

伎心最是難平須知不平則險丈夫不肯求人胸次卻無坑

坎

身爲子孫之根心爲萬事之本人生心過實多怕的最是心
術

一事不肯放鬆一言必圖報復外面聲息俱無豈知裏面最
毒

妄人最會怪人奸人最會疑人其勢必至枉人其心俱可殺
人

稱人之惡則喜道人之善則忘不願人做好人卽此已爲敗
類

你看跟前的人是人都覺不好你有甚麼好處度量先已狹

西滙外集

卷八

六言

二

六

小

或爲遭際所迫亦有識見之差大小替他原諒那便指摘交

加

一任無理取鬧祇如不聞其聲一任有心搬弄祇如不識其

人

人亦何所不有糊塗必至荒唐事亦何所不有橫逆概屬尋

常

釁由倉猝而開卽時力制其忿忿由積漸而成平時豫弭其

釁

門外之讎易釋家庭之恨難消隱忍終須決裂由來不是一朝

既已黏皮帶骨萬難一劃兩開最要留他情面先須看破錢財

小人休與結怨亦莫與之作緣聲名怕爲所損還防事故牽連

蠢人未必有心其初順口撒謊久之遂成慣病無事不虛不罔

亦有自以爲能事事都像精明白地落人圈套一毫知覺不

會

西滬外集

卷八

六言

堯

方纔習這一藝又要別操一技世事無不可爲白頭不成一事

一生委委靡靡祇是拖泥帶水一旦真真切切便可斬釘截鐵

身之靈也以心身之強也以精失其心者悖理耗其精者戕生

君子莊敬日強小人安肆日偷作僞心勞日拙作德心逸日休

行兵要有紀律讀書要有課程處事要有刀尺立身要有準繩

能伸先要能屈能飛還要能伏能方妙在能圓能直妙在能曲

心裏十分關切說人不可太甚心裏十分透徹說事不可太盡

意將炫己之長必且爲人所短樞機是以宜慎鋒鏖是以宜斂

急時易至慌張定心且再思量疎處難得周詳用心且自慊

西滙外集

卷八 六言

十一

防

險阻伏於平地饑饉伏於豐歲豐勿狃以爲常平勿狎以爲

易

破鼓可以救月破傘不可遮雨何妨補這破傘且莫棄那破

鼓

心以不用而廢偏用則識亦蔽事以好謀而成陰謀則孽必深

人不能見鬼神鬼神則能見人人心最是難測鬼神洞見肝

膈

鬼神喜人爲善有心之善亦旌鬼神惡人爲惡無心之惡亦懲

莫言六道杳冥報應極是分明人間顯有地獄餓鬼畜生滿目

豈獨天道好還竝覺人言可畏在在入耳警心都是嚴師酷吏

懵懂人喚得醒難醒的聰明人人到自是自滿神仙黜化不成

雜言

西滙外集

卷八

五

寸金寸陰寸草寸心世少百年之人家有白頭之親

屋無梁則折田無水則裂鐙無油則滅人家無子人則絕

妻好不在姿色兒好不在嘴舌

家庭有規矩朝廷有法紀官長要人違罪命娘要兒近理

一身之元氣足則外邪不侵一家之元氣足則外侮不陵

月米一斗可餬一口百口也不嫌多各有一藝在手

享福怕早甜不宜少苦不宜老

食用有餘斷然不可積錢學識不足斷然不可做官

冤死莫告狀窮死莫借帳

不欠債大自在不作惡大快活

冤宜解不宜結忿宜蠲不宜洩

尤人不如自尤求人不如自求

有氣性的人便死也敢沒筋骨的人便死也軟

但是當做的事切莫畏難任是難做的事祇要耐煩

鏡勿使垢劍勿使鏽心不磨不透

腳要處處踏穩心要時時提醒

占小便宜喫大虧仗小聰明無大成

聰明才辨不足羨也老朽窮酸不可厭也

西滙外集

卷八 雜言

五

一犬吠形百犬吠聲細人以耳爲目淺人有口無心

鼠口噉噉之時多一句不如少一句鼠目眈眈之地進一步

不如退一步

自高者危自滿者虧

自晦莫自明自重莫自輕

非平淡無以養性非貞靜無以定命

命是自然之命理是當然之理小人枉了做小人君子落得

爲君子

頭尖善鑽身輕善緣舌長善餌爪深善箝貪饒婪酣苟賤不

廉

窮人窮命低頭枉拜財神賤人賤相開口便說貴人
閉戶讀書尺步繩趨寧作書中之蠹莫作人中之蛆
可憐的才人薄命可怕的文人無行

但有銛鋒無寸鐵以之殺人不見血此何物哉筆與舌

不顧人命橫取人財心壞身壞名壞壞盡還有後災

穢人閨門敗人名節亂人嗣續自失骨血罪大惡極難說難

說

勢相通名相齊心相忌力相擠強者雖勝終亦顛墮

西樞外集

卷八 雜言

七

損他人之物折自己之福壞他人之事作自己之祟

苟以心術之險行於骨肉之閒天性太薄天譴尤嚴

人悔過天悔禍

過而悔之天豈罪之悔之而未卽改之天猶姑待之

孽之所不可活者天之所莫能脫也

要明世故要達時務

好是見怪不怪其怪自敗亦有當斷不斷反受其亂

不用僻藥不害爲良醫不押險韻不害爲好詩若無後著決

然不是高棋

峻怕狹圓怕滑

口要緘得穩舌要卷得緊事到不得不言言即無容苟隱
義所當爲人人共赴豈可獨爲小人甘與君子異路
避害之心太明究竟未必有害甘受譏評枉生機械

救人一命勝造七級浮圖完人一家骨肉樂於二十四考中
書

抱著一段喜神祇覺世無可惡之人含著一腔生意惟願人
無不遂之事

忽忽一日匆匆一生到頭成件甚事到底算箇甚人

西樞外集

卷八雜言

青

好酒者十之一好色者十之七好財者十而十

有錢而畜錢有官而辱官讀書不知書三般太糊塗
奇之又奇兒不怕老子老子怕兒

